

●幣制本位之參考

壹庵編

吾國幣制龐雜。今昔相襲。大都用銀而輔之以銅。初無所爲本位。自日本金井延氏山崎覺氏等盛言中國幣制本位之酌定。而學者遂紛紛聚訟。視爲吾國財政上之絕大問題。推其主張。約可分爲二派。甲派則以近時各國文化開明。商業發達者。雖已皆用金本位。然而吾國經濟現象若此。國民之生活程度又若彼。若必欲行金本位制。則恐利未生而害已起。反足以令社會上生種種困難。殊非審時之道。不如仍用銀爲本位。庶幾得一般行使之利便。此一說蓋純本乎金氏之言。乙派則主張山氏說者。謂世界進化。日趨大同。今各國大半已行用金本位制。使一二國獨異。則所損必多。且中國近時財政。動需外債。盈虛虧蝕。折耗至鉅。苟亦能用金本位者。則將來經濟上。當可無昔日之患。此二說理勢各執。然當前清時度支部。亦未決意謀更張。故亦祇成一理論。後美人精琦氏至中國。參酌二氏之說。建議用虛金本位制。其法謂虛立一金本位。其市上通用。則仍以銀合價計算。其說折衷至當。頗爲一時所贊許。近來民國政府成立。全國金融恐慌。較之前清實甚。借債一途。將成不可廢之說。然而幣制上之改革。亦實當今切要之圖。本位之定。允宜取決於此時。庶他日無鏹虧息折種種虧折。而內地貨幣之使用。亦得因以劃一。乃可冀掃除前清諸弊。此吾國民所亟當研求者也。茲特將世界著名各國本位制度各利弊。詳加考核。俾便取則。願熱心國事者注意焉。

世界近時通行之本位制度凡二。即單本位制複本位制二者是也。單本位制度凡三種。一金單本位。二銀單本位。三紙單本位。金單本位。各國目今最通行之本位制。美俄英法德奧日意西班牙荷蘭瑞士丹麥葡萄牙挪威瑞典英領澳洲印度加拿大墨西哥皆用之。法意白瑞四國。一八五六年

結臘丁同盟條約。雖訂定用金銀複本位制。然不久即復加入不許復制銀幣一條。乃全成一金本位之制度。日本俄羅斯印度墨西哥。亦皆見世界潮流之趨向。紛紛改易。蓋皆生活程度之日高。有以使之銀單本位。則惟暹羅秘魯波斯法屬新加坡英屬印度香港非列賓南之火脫利英屬亞非利加之西部行用之。紙單本位。則現已無國行此制者。惟歷史上或可考見。蓋軍事倉卒之際。或以爲救急之需。不允紙幣之發行。良以此故。故各國每經戰事。必釐訂財政。免流入此種制度。此不過救急上之一暫行品。不可爲則置之已廢之列可也。

由上面種種比較。開化國之用金本位制者實多。金井延氏之言曰。『世界強國。固皆用金本位矣。然而人口之相較。則用銀者實較用金者爲多。如印度全國。幾皆用銀本位。用金本位者。惟城鎮爲然耳。中國幣制複雜。雖本位未定。而調查各情況。實以用銀爲宜。蓋中人以下之家過多。尋常人民得銀即足。終年所入不及數金。安能行使。』是言也。未可非之。

以上單本位之制度。既如此。所謂複本位者。即以兩種物質。法律上規定之。使同爲本位。至二種以上。則尙未之見焉。徵之用複本位之名國。如昔時臘丁同盟之法蘭西意大利白耳義瑞士四國。及西班牙羅馬利亞希臘。均經採用此制。然大都爲金銀兩本位制。至南亞美利加則亦有稱用兩本位制者。然制度凌亂。無可得其詳細。日本亦曾採用之。而未實行。惟此皆已成陳迹。今日世界上之複本位國。蓋幾幾乎不僅見矣。

兩本位雖已不甚通行。然其法亦頗可採。大約爲金銀兩種。苟既經法律認定通行。則無論如何。人民必當遵守規定之價格。而無異議。惟其價格上之比較。必按市場上地金地銀之價格。折衷至當。

立一最公平之價格。然後能得一般行使之歡迎。此蓋事實上之必然者。然地金地銀亦每因一切需要供給之原因不能免種種變動。故其價格常有漲落。或較規定價格減少。即所謂惡貨是也。或較規定價格增加。則成良貨矣。惡貨行則良貨每受驅逐。於是復由複本位成單本位。每足使國家受其影響。惟此種市價之漲落。既足以生高低之區別。而物價每視惡貨之價格以爲盈虛。金低則隨金。銀低亦然。如此則本位雖生大變動。而物價反受其調劑。不至過於懸隔。最宜於民生計者。單本位則貨價惟視一種之幣價而行。設幣價有大變動。則物價隨之爲市場絕巨之妨礙。更無術以劑之。由此觀之。則複本位似又較單本位爲勝矣。蓋二種本位同行於時。金價高而銀價低。則人盡趨銀。銀價必因以增漲。銀價既增。金價必復於舊消息互報。一來一復。必重歸於法定價格。而後已。可長免偏重之患。既可使價格之變動少。又可以互制其價格之變動。而貨幣流通額必以加增。徵之經濟學之原理。蓋無有不然者。其爲益殊非淺也。

雖然五洲交通。一國不能獨行其道。複本位固似較美。備於單本位。然金銀兩價互相增跌。使有他國人貿遷逐利於其中者。則其害尙可勝言。若是。則一國之經濟市場。將爲萬國人逐鹿之地。此勢所不能免者也。無論商業如何發達。國產如何富饒。決不能以一國爲衆矢之的。苟欲行此制。使萬國一致。庶幾能有利無害。曩比國曾創貨幣同盟之議。討論數次。卒以利害不同。意見分歧。而歸失敗。惟今日學者之主張國際複本位制者。頗有勢力。或可達萬一之望云。

本位之種種狀況。既略具如上說。然此種本位說。要亦有賴於國家之信用。蓋國家對於貨幣上之責任實繁。鑄送規定。均須十分適宜。然後能得其效果。否則徒爲形式上之改良。信用不昭於衆者。則一切財政上之補救。猶之無濟。此則在執行者持平衡斷可耳。

(右稿錄東
方文庫)

●角龍詩集 二甲進士鄧文瑞

▲讀孟子有感（續二）

其五 邪言歸墨又歸楊。一筆春秋繼素王。道想大同天舜禹。志行中國地齊梁。禹周往矣無三聖。桀紂誰耶有七強。到底邱民今古貴。明朝受箭看錢唐。

其六 桓文無道孔門徒。儀衍原非大丈夫。隣壑莫云丹愈禹。笠豚只欲墨歸儒。晝三宿出何濡也。祿萬鐘辭是富乎。自信天民先覺在。舉安何日見唐虞。

其七 天將斯道覺斯民。繼往開來繫此身。進退賓師常綽綽。時中道統最醇醇。知言養氣擴前聖。拒諛闢邪期後人。出處宛然家法在。兩楹配享萬年春。

其八 七篇好辯豈空言。三古傳心道尚存。一亂未能回氣化。隻身直欲挽乾坤。興亡人牧先懸

鑑。富美師墻得入門。自古江河擊砥柱。至今洙泗有淵源。

●讀論語有感

其一 記曾少小慣庭趨。講到從心矩不踰。禮學夏殷文有獻。服同魯宋行從儒。瓜原可食飽非繁。匱豈終藏玉待沽。勇或乘桴稱過我。富寧附邑斥非吾。

其二 壯歲從遊歷問津。申商先冉共風塵。耦耕處處逢沮溺。荷篠時時見丈人。微畝何曾知疾固。桓魋且欲喪斯文。尼谿書社封皆阻。合四科賢並在陳。

其三 五十知天六八歸。周公不夢嘆吾衰。自家義易編三絕。誰子麟經贊一辭。退與兼人同冉季。過猶不及等商師。小人君子儒難辨。休罪西河使衆疑。